

四

教

義

四教義卷第五

隋天台山修禪寺沙門智顓撰

第三約別教明位。釋淨無垢稱義者。別教詮因緣假名。如來藏佛性之理。菩薩稟此教門。修行得證。必有淺深。故須明位。此別教入道。亦有四門。一有門。二空門。三亦空。亦有門。四非空。非有門。別教雖有四門。而尋經論意。多用亦空。亦有門。明行位也。如涅槃經云。第一義空。名爲佛性。又云。智者見空。及與不空。聲聞辟支佛。但見於空。不見不空。不空者。卽佛性也。若赴機利物。四門入道。各逐根緣。豈可偏用。但一往明位。

義便事須如此是以今明別教行位還約空有門以辨也。就此卽有四意。一經論出別教菩薩位不同。二總明位。三別解釋。四約教位釋淨無垢稱義。第一經論出別教菩薩位。斷伏對法門不同者。尋別教正明因緣假名恆沙佛法。佛性涅槃常住之理。菩薩稟此教。觀三諦理。歷劫修種種行。斷恆沙無知別惑。欲見佛性。求常住四德涅槃。是則教別理別。智別斷別。行別位別。因別果別。此唯明一乘。二乘聞此。如聾如啞。但諸經明此別位名數多少。斷伏高下。對論諸法門。多有不同者。卽爲三。一者位數不同。二斷伏高下不

同。三對法門不同。一位數多少不同者。如華嚴經明三十心十地佛地。有四十一地。瓔珞經明五十二位。仁王經明五十二位。新翻金光明經。但出十地佛果。勝天王般若大品經等。亦但明十地佛地。不辨三十心等覺地也。涅槃經明五行十功德。約義配位。似開三十心十地佛地。而文不出名。又十地論攝大乘論地持論。十住毗婆沙論。大智度論。並釋菩薩地位。如此等諸經諸論。明菩薩位。名數多少不同。斷伏高下亦異。對諸法門明位。非無殊別。所以然者。此既明界內界外生法兩身。菩薩行位。如來方便。用四悉檀。化

界內眾。隨機利益。豈得定說。若不廣尋經論。則不知同異。偏取定執。空增諍論。此同無目而諍天上日。今明別教大乘次位。須用瓔珞仁王兩經。若明斷伏高下。須約小品三觀。若明觀行對法門意。取涅槃五行釋義對諸法門。隨便採諸經論。一家說法。正在初心。觀門教門。須分明也。諸佛菩薩三乘聖位。此非凡測。寧可妄說。而須明位知大意者。若行修道。破增上慢心。若說法講經。權須消文。引物希向。又欲令聽者咸知大乘經論。出別教菩薩位行不同。寧可偏執是非。諍競耶。問曰。何意約數的取瓔珞仁王判位名目。答

曰華嚴頓教多明圓位。四十一地。又不出十信之名。諸大乘方等經文多明諸法門。不正辨位。前四時般若亦多明菩薩觀行法門意。亦不在辨位。今謂瓔珞明五十二位。名義整足。恐是結成諸大乘方等別圓之位也。仁王般若明五十一位。恐是結成前四時般若別圓之位也。法華但開藏通別之權位。顯一圓位。涅槃大意亦明別圓兩位。而不出名目。問曰。斷伏高下。何故約小品三觀答曰。一家義便。問曰。別教觀行對法門。何故取涅槃五行。答曰。末代入道。正得其宜。別教明觀行有一種。一者不共。二乘說。如華嚴十

地論。地持九種戒定慧。及攝大乘論。二者共二乘說。如方等大品。中論釋論明涅槃五行。實爲末代行用之要也。第二總明別教菩薩位者。卽爲三意。一約瓔珞經明位數。二約大品經三觀明斷伏。三約涅槃經對法門辨位。一約瓔珞經明位數者。瓔珞經有七種明位。七位者。一者十信。二者十住。三者十行。四者十迴向。五者十地。六者等覺地。七者妙覺地。初十信卽是外凡別教。乾慧地伏忍之位也。十住卽是習種性位。從此已去。盡三十心解行位。悉是別教之內凡。性地柔順忍位也。約別教義推。如暖法也。十行者卽是

性種性。別教義推。如頂法也。十迴向。卽是道種性。別教義推。如忍法也。世第一法也。問曰。別教何須明暖頂。忍耶。答曰。十地旣對四果。故須明也。通教通真似解。說爲暖頂。忍世第一法。今別教別真似解。義立此名。比決分明也。次十地。卽是聖種性。此皆入別教四果聖位。悉斷無明別見思惑也。六等覺位。卽是等覺性。若望菩薩。名等覺佛。若望佛地。名爲金剛心菩薩。亦名無垢地菩薩也。七名妙覺地。亦名妙覺性。卽是究竟佛菩提果。大涅槃之果果也。二約大品經。及三觀。合位明斷。伏高下者。大品經云。佛告舍利弗。菩薩

欲具足道慧。當學般若波羅蜜。卽此是十信。習從假入空。伏愛論見論。欲入十住位。若得十住。卽斷界內見思也。欲以道慧具足道種慧。當學般若。此卽修從空入假。入十行也。欲以道種慧具足一切智。當學般若。此卽修中道正觀。入十迴向位也。欲以一切智具足一切種智。當學般若。此卽是證中道觀。入十地也。欲以一切種智斷煩惱習。當學般若。此卽是等覺地。無明煩惱習盡。名之爲佛。卽是妙覺地也。問曰。智度論何故云。佛說三智。一心中得。答。爲辯圓教。從初一地卽具足一切諸地。若執此義。卽乖三慧品。說別相。

三智之義也。三約涅槃經明五行合位者。初戒聖行。定聖行。生滅四諦。慧聖行。即是十信位次。無生四真諦。聖行。即是十住位次。無量四聖諦。即是十行位次。明修一實諦。無作四聖諦。即是十迴向位次。若發真見一實諦。證無作四聖諦。即是聖行滿。住無畏地。得二十五三昧。能破二十五有名歡喜地。五行具足。次後而說十功德者。恐此表住大涅槃十地之功德也。過此明住大涅槃。即是妙覺地。第三歷別解釋者。釋七番別位。初明十信心者。一信心。二念心。三精進心。四慧心。五定心。六不退心。七迴向心。八護法心。九戒。

心。十願心。此十通名信心者。信以順從爲義。若聞說別教。因緣假名。無量四諦。佛性之理。常住三寶。隨順不疑。名信心也。今略釋初信心。義卽爲二意。一發菩提心。二行菩薩道。發心卽是目。修行卽是足。目足備故。入清涼池。卽是別教初賢善直之義也。一發菩提心者。聞大涅槃方等經典。因信解心。大悲誓願發也。大涅槃經明有五。行。一聖行。二梵行。三天行。四嬰兒行。五病行。云何菩薩修聖行。若從如來聞大涅槃經。聞已生信。作是思惟。諸佛世尊。有無上道。有大正法。大眾正行。復有大乘方等經典。我當願樂。割愛修道。

卽是信心。所以者何。若聞大涅槃經。信心歡喜。卽信佛性常住三寶。卽是信非因非果。大涅槃果也。若聞五行。心生愛樂。卽是信非因之因。聖行因也。若信心開發。卽是發菩提心。欲行菩提道。發菩提心者。卽慈悲憐愍一切眾生。於無量四聖諦。慈與眾生無量道滅之樂。悲拔眾生無量苦集之苦。起無量四弘誓願。未度無量苦諦者。令度。未解無量集諦者。令解。未安無量道諦者。令安。未得無量滅諦者。令得。大涅槃常樂我淨。是爲別教菩薩。因於信解。初發菩薩心也。問曰。前明因大涅槃經四種聖諦。約此入辯別教菩薩。

位。今何但約無量四聖諦發弘誓。不取餘二種四諦發願耶。答曰。若在別教。此四種四諦皆名無量。所以者何。菩薩觀無量生滅四諦調心。異於二乘觀無量無生滅四諦斷界內結。異於二乘觀如來藏無量四諦之理。雖非卽是無作。而二乘亦不聞其名。若證無作四諦。爾時無作亦名無量。所以者何。依一實諦卽有四諦名爲無作。世間出世間因果法相數量無邊。與虛空等。亦名無量。緣無量四諦發菩提心。卽是四種四諦也。問曰。若生滅無生滅二種四諦皆名無量者。何故勝鬘經說名有量四聖諦耶。答曰。雖復數無。

邊量。在二乘心同歸灰斷。故名有量也。問曰。若有無作。何意不約無作發心。答曰。此無作猶是無量。以無作證果時名。非不思議無作也。如生滅盡。非是無生四諦也。二明修菩薩行者。卽是受持讀誦大乘方等。爲人解說。自行聖行。亦教人行聖行。自行聖行者。大涅槃經聖行有三種。一戒聖行。二定聖行。三慧聖行。菩薩思惟佛性之理。幽微難見。初心不可頓入。必須持戒修定慧。次第三觀調心。而入中道三諦。惑障若除。方乃得道。見於佛性。住大涅槃。別相三觀。如前說。一戒聖行者。菩薩護持五篇之戒。如護浮囊。愛見二

種煩惱羅刹來乞。若能與我。令汝得入涅槃者。令得屬愛世間樂之涅槃。屬見世間樂之涅槃也。菩薩若不隨愛見破戒。卽具五支諸戒。所謂具足菩薩根本業清淨戒。前後眷屬餘清淨戒。非諸惡覺覺清淨戒。護持正念念清淨戒。迴向具足無上道戒。又復護持性重戒。息世譏嫌戒。等無差別。如是持戒。施與一切眾生。願一切眾生得清淨戒。善戒不缺戒。不析戒。大乘戒不退戒。隨順戒。畢竟戒。具足戒。成就諸波羅蜜戒。菩薩善能護持諸戒。得入於初不動地。菩薩住不動地中。不動不退不散。是名菩薩修戒聖行。二修定

聖行者。所謂從初安般。隨息觀息。入根本特勝通明淨禪。見身三十六物。如明眼之人。開倉見穀粟麻豆。又分別三十六物。不見有我。又修八背捨觀禪。觀身內外不淨。除卻皮肉。諦觀白骨。見骨色相異。所謂青黃白色。鴿色。如是骨相。亦復無我得觀禪欲界之定。菩薩爾時次第觀骨。觀青骨時。見此大地東西南北。悉皆青相。黃白鴿色。亦復如是。此卽是得觀禪未到地定成也。又云。作是觀時。眉間出青黃赤白鴿等色光。光中見佛。是爲初背捨。乃至成就八背捨。八勝處。十一切處。九次第定。師子奮迅三昧。超越三昧。菩薩

住背捨勝處諸禪定中修四無量心六波羅蜜四攝法神通變化卽是其念處又因受持讀誦大乘方等於禪定中思惟名義修四無礙辯卽是緣念處若念處成就卽得住於堪忍之地是名菩薩修定聖行此二念處若未與性念處相應猶屬停心初賢位也三修慧聖行者卽是四諦大涅槃經云所言苦者逼迫相集者能生長相滅者寂滅相道者大乘相又復苦者現相集者轉相滅者除相道者能除相又苦者三苦集者二十五有滅者滅二十五有道者修戒定慧此卽是先觀生滅四諦調伏界內見思煩惱修性念

處卽是正觀苦諦。若觀是苦集。是苦滅。是苦滅道。如是正觀生滅四諦。傍觀無生無量中道佛性之理。而正用生滅四諦。伏界內屬愛屬見一切煩惱結集。皆是性念處。智慧力也。性念處。義具如前說。菩薩得是性念處。與前共緣處合。卽是堪忍地。智慧善根增長。從初信心。乃至願心。十心成就。卽是鐵輪外。凡乾慧。伏忍也。問曰。別教菩薩。成就幾法。所得信心。異前通。教。答曰。還約十法。卽知不同。一信正。因緣者。卽是知四種四諦。因緣不亂也。二真正發心。知於無量四諦。發慈悲誓願也。三勤修止觀者。卽知次第善修四種。

止觀也。四破法徧者。卽觀因緣生滅。空假中三諦惑徧也。五知通塞者。卽知四種道滅是通。四種苦集卽是塞也。六善修道品者。卽是知次第修四種三十七道品也。七善修助道法者。卽是背捨勝處。能成一切對治。六波羅蜜。助開三解脫門也。八善識次位者。卽知因四種四諦。入七位。不叨濫也。九安忍強軟賊者。卽是知修四種道諦時。於四種苦集心。能安忍也。十順道法。愛不生者。卽知次第修四種道諦。發諸順道法。不生愛著心也。別教信心菩薩。解此十事。分明。異於通教之信心也。此之十法。深解義趣。卽得用釋十

信心。至下明圓教十信。備出其相也。瓔珞經云。一信有十。十信有百。此之百法。爲一切道法之根本也。二明十住位者。卽是十解習種性。初入內凡十賢之位也。一發心住。二持地住。三修行住。四生貴住。五方便具足住。六正心住。七不退住。八童真住。九法王子住。十灌頂住。此十通名住者。會理之心名之爲住。故仁王般若云。入理般若名爲住。此卽體假入空觀成發真無漏見通教真諦之理。斷界內見思惑九十八使。故名發心住也。此有二義。一發真解住。偏真法性之理。二生中道似解住。第一義佛性之理。若生偏真之

解卽是通教八人地見地智斷齊生中道似解是初
得別教善有漏五陰入別教內凡性地柔順忍之位
也所以者何是菩薩因前持戒禪定生滅四諦智慧
調心觀無生四諦斷界內見思煩惱是聲聞經說五
種佛子位齊五種佛子者一須陀洹佛子二斯陀含
佛子三阿那含佛子四阿羅漢佛子五辟支佛佛子
開一爲二合十品卽對十住位斷見思煩惱及習氣
是辟支佛齊侵斷恆沙上品但菩薩觀無生四諦如
涅槃經說凡夫有苦無苦諦聲聞緣覺有苦有苦諦
而無真實諸菩薩等解苦無苦是故無苦而有真諦

凡夫有集無集諦。二乘有集有集諦。諸菩薩等解集無集。是故無集而有真諦。聲聞緣覺有道非真。菩薩有道有真。聲聞緣覺有滅非真。菩薩有滅有真。無生四真諦。具如通教初說。但大涅槃明此滅諦是常樂者。此意與通教有同有異。同卽四諦卽真。通教三乘觀無生四諦。見第一義。卽真諦也。別者。菩薩知於空。卽是不空。別知佛性涅槃。常樂我淨也。問曰。若爾。涅槃何得說二乘有苦有苦諦而無真實。答曰。此明聲聞經三藏教門所辨。非關摩訶衍初門通教也。若得滅道。能觀佛性常住。卽發中道似解。爲別教之暖法。

也。三明十行位者。卽是性種性內凡十賢。一歡喜行。二饒益行。三無瞋恨行。四無盡行。五離癡亂行。六善現行。七無著行。八尊重行。九善法行。十眞實行。此十通名行者。行以進趣爲義。前旣發眞悟理。從此加修。從空入假。觀無量四諦。無量四諦。如大涅槃經說。知諸陰苦。名爲中智。分別諸陰。有無量相。悉是諸苦。非諸聲聞緣覺所知。是名上智。是名無量苦諦。知諸入者。名之爲門。名爲苦諦。分別諸入。有無量相。悉是諸苦。卽是無量苦聖諦也。知十八界。名之爲分。亦名爲性。卽是苦諦。分別諸界。有無量相。悉是諸苦。是名無

量苦聖諦。所言無量集聖諦者。知愛因緣。能生五陰。名之爲集。一人起愛。無量無邊。況一切眾生所起諸愛。如是等愛。無量無邊。卽是無量集聖諦也。所言無量滅聖諦者。知滅煩惱。名爲滅諦。分別煩惱。不可稱計。滅亦如是。不可稱計。卽是無量滅聖諦也。所言無量道聖諦者。能斷煩惱。名爲道諦。分別道相。無量無邊。所離煩惱。亦無量無邊。卽是無量道聖諦也。如是四諦。大涅槃經說。悉云。非諸聲聞緣覺所知。故知此屬別教菩薩之所學也。菩薩住此無量道諦。學十波羅蜜。一切諸道。斷塵沙無知中品。十行成就。從空入

假平等觀成也。得道種慧法眼清淨相似中道之解。轉更分明。卽是別教頂法之位。菩薩住此位中。遊戲神通。淨佛國土。成就眾生也。四明十迴向者。卽是道種性內。凡後十賢也。一救護一切眾生離眾生相迴向。二不壞迴向。三等一切佛迴向。四一切至處迴向。五無盡藏功德迴向。六隨順平等善根迴向。七隨順等觀一切眾生迴向。八如相迴向。九無縛無著解脫迴向。十法界無量迴向。此十通名迴向者。迴事向理。迴因向果。迴己功德。普施眾生。事理和融。順入法界。故名迴向。正修中道第一義觀。從無量四諦學無作。

四諦也。約實說。四實不作四。故名無作之四。觀四得實。故名四實。因名無量。得果名無作。證果斷苦集。有道滅。非圓教之無作也。今立無作四實諦名。義意在此。故涅槃云。一實諦者。名爲眞法。若法非眞。不名實諦。實諦名無顛倒。無顛倒者。名爲實諦。實諦無有虛妄。若有虛妄。不名實諦。實諦名爲大乘。非大乘者。不名實諦。實諦是佛所說。非魔所說。若是魔說。非是實諦。實諦者。一道清淨。無有二也。有常有樂。有我有淨。是則名爲實諦之義。又涅槃云。一實諦者。卽是如來。虛空佛性。無差別也。有苦有諦。有實。有集。有諦。有實。

有滅有諦。有實有道。有諦有實。如來非苦非諦。是名爲實。虛空佛性亦復如是。又涅槃云。所言苦者。名無常相。是可斷相。是爲實諦。如來之性。非苦非無常。非可斷。是名爲實。虛空佛性亦復如是。所言集者。能令五陰和合而生。亦名爲苦。亦名無常。是可斷相。是爲實諦。如來非是集性。非是陰因。非可斷相。是爲實諦。虛空佛性亦復如是。所言滅者。名煩惱滅。亦常無常。二乘所得。名曰無常。諸佛所得。是則名常。亦名證法。是爲實諦。如來之性。不名爲諦。能滅煩惱。非常非無常。不名證知。常住無變。是故名實諦。虛空佛性亦復

如是。所言道者。能斷煩惱。亦常無常。是可修法。是名
實諦。如來非道。能斷煩惱。非可修法。常住不變。是爲
實諦。虛空佛性。亦復如是。若菩薩學無量無作四諦
觀。觀知如來藏。無量生死種子。恆沙佛法。斷恆沙下
品煩惱。伏無明別惑。見相似中道之解。更轉增明。法
界願行。事理和融。成別教一切智。得六根清淨。卽是
別教忍法世第一法位。五明十地者。此是聖種性位。
從此見佛性。發中道第一義諦。觀雙照二諦。心心寂
滅。自然流入薩婆若海。證無作四諦。一實平等法界。
圓融。從初地至佛地。皆斷無明。但以約位。分爲三道。

初地名見諦道。二地至六名爲修道。從七地已去。名無學道。十地者。初歡喜地。二離垢地。三明地。四燄地。五難勝地。六現前地。七遠行地。八不動地。九善慧地。十法雲地。此十通言地者。一能生成佛智。住持不動。二能與無緣大悲。荷負一切。故名爲地也。初歡喜地名見道者。初發真中道。見佛性理。斷無明見惑。顯真應二身。緣感卽應。百佛世界。現十法界身。入三世佛智地。能自利利他。真實大慶。故名歡喜地也。大涅槃云。菩薩聖行滿。卽是住於無所畏地。卽是初地菩薩。離五怖畏。無死畏。無不活畏。無惡道畏。無惡名畏。無

大眾威德畏。涅槃經雖不作此名。義推辱同。若言不
畏貪欲。患癡。內無三毒。外離八風。無惡名畏也。若言
不畏地獄等。卽無惡道畏。若言不畏沙門婆羅門。卽
無大眾畏。今旣入無畏地。見中道。則無二死。故言無
死畏也。法身常命已顯。無不活畏。以得入此地。故則
具二十五三昧。破二十五有。顯二十五有之我性。我
性卽是實性。是名慧行。成就得王三昧。卽五行成。住
於無畏之地。卽得初地之名也。就此卽爲五意。一明
得二十五三昧。聖行成。二明梵行。三明天行。四嬰兒
行。五明病行。一明得二十五三昧。聖行成者。卽爲三

意一釋二十五三昧名。二正明修二十五三昧成。三外用利物。一釋二十五三昧名者。略爲四意。卽是約四悉檀而立名也。一者隨時趣立名。二者隨便立名。三隨治立名。四隨理立名。一隨時立名者。譬如人有二十五子。隨時名作一字。大者初生。爲作一字。次者後生。又作一字。不可見大兒名。此亦令第二者名。此如是則濫。此二十五名。亦如是。各舉一名。令世諦不亂。世間名字皆爾。不可求定實也。二者隨二十五有。便立名。若作餘名。事義不便是。故隨便立名也。三者隨對治立。二十五三昧名。各治一有。因是故對治得名。

四隨理立名者。此二十五不出法性理。理含於義。從義而立名。名義雖別。理實無異。約此四意。故得立二十五三昧名也。詳經文意。多用對治約理兩義。以立二十五三昧名。二正釋修成二十五三昧者。一一三昧中皆有四意。一出諸有行業惑障。二用三昧治破。三結成三昧。四慈悲破有。一一悉具此四意也。初約無垢三昧破地獄有。卽爲四意。一明業結者罪之尤重。莫若地獄惡業垢重。見思垢塵沙垢。無明垢。二明用三昧破者。菩薩爲破此諸垢。故修前根本戒。破惡業垢。修前八背捨等定。伏見思垢。修有作無生等慧。

斷見思垢。修無量慧。破塵沙垢。修無作慧。破無明垢。三明結成三昧者。破見思垢故。真諦三昧成。破惡業垢及塵沙垢故。俗諦三昧成。破無明垢故。中道第一義三昧成。四明慈悲利他。菩薩已自破地獄。故得三諦三昧。有大慈悲。冥熏法界眾生。有機關於慈悲。以王三昧力。法性不動而能應之。如薩婆數調達。應入地獄。隨其所宜而爲說法。破地獄有。如聖行所明。自修戒定慧等諸行。故自證三諦三昧成。於聖行中。有慈悲誓願。故破他三諦上垢。亦破他三諦上惡業。煩惱垢。自既無垢。令他無垢。故此三昧名無垢三昧也。

自下具此四意。類前可知。次不退三昧。破畜生有者。畜生無慙無愧。起惡業故。退失善道。見思故。退塵沙。故退無明。故退菩薩爲破諸退。故修戒忍。破惡業。退修定。伏見思退。修生滅無生慧。破見思退。修無量慧。破塵沙退。修無作慧。破無明退。見思破故。位不退。三昧成。塵沙破故。行不退。三昧成。無明破故。念不退。三昧成。自以修行力。破三種退。滅三不退。自得三諦三昧。慈悲之力。冥熏法界。隨畜生有機感。或爲象王。啄鳥大鷲之身。隨其所宜。而生其中。而爲說法。破畜生有。自旣不退。令他不退。故此三昧。名不退三昧也。次

心樂三昧。破餓鬼有者。餓鬼常爲慳業纏繫。貪愛飢
餓苦。見思煩惱苦。塵沙無知苦。無明闇蔽苦。菩薩爲
破是諸苦。修戒施。破慳惡業苦。修定。伏見思苦。修生
滅等慧。破見思苦。修無量慧。破塵沙苦。修無作慧。破
無明苦。破見思苦。故真諦無爲心樂三昧成。破慳惡
業塵沙苦。俗諦分別多聞心樂三昧成。破無明苦。中
道常樂三昧成。以自修行。證得三樂三諦三昧。以諸
行中慈悲之力。熏現諸鬼形聲。施令得飽滿而爲說
法。令破三種苦。得三種樂。菩薩自得此樂。又令他得
樂。是故三昧名心樂三昧也。次歡喜三昧。破阿修羅

有。修羅多忿恚。惡業怖。見思怖。塵沙怖。無明怖。菩薩
爲破是諸怖。故持戒精進。而修諸行。不破戒喜。破惡
業怖。修禪悅喜。伏見思怖。修生滅等慧。得喜覺喜。破
見思怖。修照鏡喜。及無量喜。破塵沙怖。修無作慧。破
無明怖。見思破故。真空喜悅。三昧成。惡業塵沙破故。
一切眾生喜見。三昧成。無明破故。喜王三昧成。以已
修行力。得如此三諦歡喜三昧。以諸行中慈悲之力。
熏修羅有。而生其中。軟言調伏。而爲說法。破修羅有。
令得無怖。自無三怖。自證三喜。令他無怖。令他得歡
喜。故三昧名爲歡喜也。次日光三昧。破弗提婆有者。

日初出於東。隨便爲名。日譬智光。能照迷暗。破惡業迷暗。見思塵沙迷暗。無明迷暗。菩薩爲破此之迷暗。故修善業戒光。修禪定流光。修生滅無生滅一切智光。修道種智光。修一切種智光明。生暗滅。以善戒光破惡業暗。禪定光。伏見思暗。以生滅無生滅慧光。破見思暗。修無量道種智光。破塵沙暗。修無作一切種智光。破無明暗。破見思暗。故一切智日光三昧成。破塵沙暗。故道種智日光三昧成。破無明暗。故一切種智日光三昧成。以修行力。自證如是三諦三昧。以慈悲力。熏弗婆提有。應現說法。破其三迷。顯三諦智日。

光。故此三昧。名爲日光三昧也。次月光三昧。破瞿耶
尼有者。月之初生。光現於西。此隨便立名也。月光亦
譬破暗。釋三昧四意。類日光三昧可知。次釋熱炎三
昧。破鬱單越有者。北方是陰地。冰結難消。自非熱炎。
終不消也。鬱單越人。冰執無我我所。難可化度。非智
火熱炎。無我所心。終不可消。彼無我我所。乃是妄計
無我所理。實由有性人我之惑。有法我惑。真如我惑。
冰執未融也。菩薩爲破此諸我惑。冰執。修生滅無生
滅等真無我慧。破性人我惑。修無量四諦。破法我惑。
修無作四諦慧。破真如我惑。若得真人空智炎。破性

人我惑。真諦三昧成。得真法。空智炎。破法我惑。得俗諦三昧成。故能如空種樹。順俗以化物也。得真如無我智炎。破真如我惑。知非我非無我。是真我義。無我法中有真我。卽見鬱單越之我性。卽有三昧成。心心寂滅也。菩薩自證三諦三昧。慈悲力故。現鬱單越形聲。破北方無我我所。令成真我三昧。故此三昧。名爲熱炎三昧也。次如幻三昧。破閻浮提有者。南方果報雜。壽命短促不定。由如幻化。此是幻出惡業果。幻出煩惱。幻出無知。幻出無明。一切眾生。不知如幻。今菩薩爲破是諸幻。故修三種三昧。修真諦三昧。幻出無

漏破見思之幻。修俗諦三昧。幻出道種智。破無知之幻。修中道三昧。幻出一切種智。破無明之幻。修行力故。自證三諦三昧成。慈悲之力故。破他力成。是故名爲如幻三昧也。次不動三昧者。破四天王有。此天守護國土。遊行世界。身報流動。此則是果報動。見思動。無知動。無明動。一心修善不動。及修背捨等不動業。破果報動。真慧不動。破見思動。出假慧不動。破無知動。中道不動。如須彌頂。破無明動。修行力故。自證三種不動。慈悲力破他三動。故此三昧。名爲不動也。次難伏三昧。破三十三天有者。此天居四天之頂。卽是

果報難伏。見思難伏。無知難伏。無明難伏。菩薩爲破其高心。是故修戒定慧。破果報難伏。修生滅無生滅。故破見思難伏。修無量慧。故破無知難伏。修中道。故破無明難伏。自行力。故成三難伏。慈悲力。故破他三難伏。故次三昧。名爲難伏。悅意三昧。破炎摩天者。此天處空。無刀杖畏。以之爲悅。實非是悅。未有不動業。悅。未有不漏。悅。未有道種智。悅。未有中道。悅。菩薩爲破此故。修四諦觀。八背捨。中禪。悅。破其動散。不悅。生滅無生。破其有漏。不悅。無量慧。破沈空。不悅。無作慧。破二邊。不悅。以無生。悅。故真諦三昧成。出假稱機之。

悅故俗諦三昧成。中道悅意故。中道三昧成。自行力故。自證三昧成。以慈悲力故。破他三昧成。故名悅意三昧也。次青色三昧。破兜率天者。此天果報樂青。服翫皆青。菩薩爲破此有。故修第一義非青眞。見青眞非青假。見青假。故得中道。見青中道。破其青有。義推可知。次黃色三昧。破化樂天有。次赤色三昧。破他化自在天有。類前青色三昧可解也。次白色三昧。破初禪有者。初禪離欲界五蓋不善。卽是定心善白。但未離見思塵沙無明等黑。菩薩爲破是諸黑行。故修三諦白法。破惑之義。推之可知。次種種三昧。破梵王者。

梵王主三千大千大千品類既多。故有種種之號。爲破其種種故。修種種空。入種種假。見種種中道。如來藏多所含藏。名種種三昧也。義推可知也。次雙三昧。破二禪者。二禪獨有內淨喜兩支。故受雙名。菩薩爲破此雙故。修雙空。雙假。雙中。雙照。二諦。義推可知。次雷音三昧。破三禪者。此禪受樂。最爲第一。著樂深入。如冰魚蟄蟲。菩薩爲破此樂。故用三諦。雷音以驚駭。推之可知。次注雨三昧。破四禪者。四禪如大地。具種種芽。若不得雨。芽則不生。一切善根。在四禪中。若得三諦雨。三智善發生也。義推可知。次如虛空三昧。破

無想天者。此是外道天。實非無想。而計爲無想。涅槃如小兒夢尿。菩薩爲破是有故。以三諦空破無想。故言之也。次照鏡三昧。破那含有者。修熏禪。隨禪生此。雖得淨色。不能知色。如鏡像。菩薩知色。如鏡像。卽空。分別無量像。依鏡。卽見本性中道。成三諦三昧。破那含有也。次無礙三昧。破空處者。此處得出色。籠飄颻無礙。未是三諦三昧之無礙。見思礙。塵沙礙。無明礙。菩薩爲修三諦三昧。破是諸礙。故名無礙也。次常三昧。破識處。識相續不斷。卽無常。菩薩爲破此無常。故修數緣常。化用相續常。佛性常。湛然常。破之也。次樂

三昧破不用處者。此不用處如癡。癡故是苦。菩薩用
三諦三昧破。得三諦三昧樂。是爲樂三昧也。次我三
昧破。非想天者。此天最頂。計爲涅槃。眞我菩薩見此
由有細煩惱不自在。卽是見思不自在。塵沙不自在。
無明不自在。何得是我爲破此我故。修三諦三昧破
之。令得無我。隨俗我。八自在我。是故名我三昧。云云
二十五有。用自修二十五三昧。一有之中。悉有三諦。
菩薩自修三諦三昧。自除二十五有三諦惑。以慈悲
力。除他二十五有三諦之惑。由是得二十五三昧之
名。或從無住之本。用四悉檀。立二十五名。如前說。通

言三昧。名調直定也。真諦三昧。以離愛見而爲調直。俗諦三昧。以稱機爲調直。中道以無二邊之曲爲調直。是故皆名三昧。若但入空之直。不名爲直。聲聞人得入空。非王三昧。若入假亦非究竟。菩薩雖得道種智。亦不名王三昧。以得中道三昧。故稱之爲王。以二十五三昧。一一皆有中道三昧。是故稱二十五三昧。悉是王三昧。涅槃經云。是二十五三昧。名諸三昧王。若入王三昧。一切三昧。悉入其中。是故菩薩住不動地。具得此二十五三昧。種種力用。須彌高廣。內於芥子中。吞吐出沒。變通自在。能入地獄。不受碎身相等。

苦。若慧聖行成能有是力。具如涅槃經說。三昧外用。利物者。所謂能隱顯二種利。一隱利益者。入王三昧。一切三昧。悉入其中。是故一切眾生。受諸苦惱。一心皈依。稱名求乞救護。菩薩於三昧中。卽觀三業。皆得解脫。解脫有八種。一破二十五有事報之苦。二破二十五有因苦。三破聲聞二十五有見思煩惱苦。四破緣覺二十五有見思煩惱苦。五破三藏菩薩二十五有見思煩惱苦。六破通教三乘人二十五有見思煩惱苦。七破別教菩薩二十五有恆沙無知別惑苦。八破圓教菩薩二十五有三諦無明之惑苦。一心稱名。

皆得解脫。意在此也。故說二十五三昧。能破二十五有也。二顯利益者。卽是住二十五三昧。十法界眾生。機緣來感。普現色身。八番與眾生樂。如觀音普門。示現神通之相也。若有眾生。應以佛身得度者。卽能入相成道。現身說法。亦是此經明住不思議解脫。種種示現也。此菩薩初地。聖行滿足。具足無緣大慈大悲。如磁石吸鐵也。二明梵行者。卽是無緣慈悲喜捨菩薩。以大涅槃心。修於聖行。得無畏地。有二十五三昧。無方大用。爾時慈悲。是真梵行。非餘梵天所修。四無量心。亦非三藏教通教等。眾生緣法緣之慈也。菩薩

爾時。以此慈悲。無緣無念。熏修眾行。無不成辦。此之
梵行。卽是一切法。故涅槃云。慈卽如來。慈卽佛性。慈
若不具足。佛十力三十二相四無所畏者。非如來慈。
故慈力弘深。能具足一切福德。以自莊嚴。名梵行也。

四教義卷第五

四教義卷第六

隋天台山修禪寺沙門智顛撰

三明天行者。卽是中道第一義天。天然之理。由行顯理。因理成行。故名理爲天行。菩薩雖入不應住。以有所得故。又應修上地智慧。十重發真。修慧破蔽。顯理成行。名爲天行。天行卽智慧莊嚴。梵行卽福德莊嚴。上求佛道。是故有聖行。天行。下化眾生。卽有梵行。病行。嬰兒行。四嬰兒行者。若菩薩福德智慧轉增。是則實相彌顯。雖不作意利益眾生。任運能有冥顯兩益。以天行之力。則有冥益。以梵行之力。則有顯益。眾生

應有小善之機。無菩薩開發不能生長。以慈善根力。如磁石吸鐵。和光利行。能令眾生得見菩薩同其始學。漸從五戒十善。人天果報。三十三天楊葉之行。又示二百五十戒。觀練熏修禪。四諦。十二因緣。三十七道品。同二乘嬰兒行。又示同修習六度百劫種相。柔伏煩惱。六度菩薩小善之行。又示同卽色是空。無生無滅。通教小善之行。又示同別教歷別次第。相似中道小善之行。皆是慈心之力。俯同羣品。提接成就。從慈心與樂。起嬰兒行。如涅槃言。嬰兒行者。能說大字。所謂婆和。此卽是同六度也。六度是小行。而求作佛。

故言大字。所謂婆和。又云。不見晝夜親疎等相。此卽同通教菩薩。卽色是空。第一義諦意也。又云。不能造作大小諸事。大事卽五逆。小事卽二乘心。此卽同別教。非生死。故無五逆。非涅槃。故無小乘心。云楊樹黃葉。卽同人天五戒十善嬰兒。又云。非道爲道。以能生道微因緣。故說非道爲道。卽是同二乘嬰兒。故知大慈善根之力。能出假化物。同其小善。方便引之。令趣佛慧。故名嬰兒行也。五病行者。此行從無緣大悲起。若爾。小善必有病行。今當分別。同生善邊。名嬰兒行。同煩惱邊。名爲病行。病行從大悲生。眾生病。是故我

病。大悲熏心。遊戲地獄。同眾生惡業之病。如調達在地獄。如三禪樂。乃至畜生餓鬼修羅亦如是。又同入天。有結業生老病死之病。又同二乘。有見思之病。方便附近。語令勤作。三藏通教菩薩亦如是。又同別教塵沙無明之病。是故菩薩還同彼病。徧於法界。利益眾生。是爲五行之相也。病行卽是此經問疾品。室內六品之所明也。初地菩薩五行具足。或是初功德也。餘九種功德。或可對九地。所言破無明見惑者。涅槃經云。自此已前。皆名邪見人也。是則兩教三乘之人。皆未見此理。故名邪見人也。是以大士訶須菩提。六

師是汝師。天魔外道共一手。作諸勞侶。意在此也。乃至別教十信三十心。雖伏此惑。既未能斷。由此成就無明別見。訶諸菩薩。惑意在此也。二從二地至六地名修道者。斷別惑三界愛。如智論明。迦葉聞甄迦琴聲。不能自安。云。三界五欲。我已斷竟。此是菩薩淨妙功德所生五欲。故於是事不能安忍。例色愛無色愛亦復如是。此是此經大士。訶須菩提云。同於煩惱。不到彼岸。入於八難。不得無難。意在此也。故從二地至六地。通名修道。斷此別惑也。今以義推。二離垢地。卽侵斷別教欲愛名斯陀舍向。三明地。卽是別教斯陀

含果。四炎地。卽是別教。阿那含向。五難勝地。卽是別教。阿那含果。斷別惑。愛欲盡也。六現前地。卽是別教。阿羅漢向。斷別色無色愛也。七遠行地。卽是別教。阿羅漢果。斷別無色愛盡。故從此名無學道也。問曰。此對四果。出何經論。答曰。別教明斷伏對四果。經論多不同也。諸大乘法師所用亦異。地論師通教判位云。初地斷見。二地斷欲愛。三地斷色愛。四地斷無色愛。地論師通宗判位有用。三地斷見。名須陀洹。從四地至六地名斯陀含。第二依法師。七地名阿那含。第三依法師。十地等覺名阿羅漢。是第四依法師。有三地。

斷見。四地名斯陀含。五地名阿那含。六地名阿羅漢。有用仁王經。四地斷見。五地名斯陀含。六地名阿那含。七地名阿羅漢。如是等異說不同。難可定依。今以義推。作四對四果也。一往似便。既無的文。佛意難解。不須局執。問曰。何故解釋不定。答曰。已如前釋。八不動地。卽是別教辟支佛地。地論師云。從此明無學道。未知的出經論。不但八地得無生忍。寂而常用。用而無相。無功用心。自然斷法界無明。色習盡也。九善慧地。無明稍薄。斷心習盡。慧轉分明。善入實相也。十法雲地。慈悲智慧。由若大雲。慈悲普洽。一切皆雨。慧雲。

能持十方諸佛所說法雨。斷無量品無明也。六等覺地者。卽是邊際智滿。入重玄門。若望法雲。名之爲佛。望妙覺。名金剛心菩薩。亦名無垢地菩薩。三魔已盡。餘有一品死魔在。斷無明習也。問曰。前通教何意不辨等覺佛耶。答曰。界內習氣易盡。故不須開法雲出等覺也。問曰。別教經論何故處處明法雲之後。更有金剛等覺。自有經論止明十地行滿。便成佛果。南北法師。抑諍論此義。答。更立等覺。未足爲疑。所以然者。華嚴經明法雲地功德智慧。用比於佛。如爪上土。方於大地。若爾。雖說一品無明。而實不可說品。何以得

知後心菩薩無功用道其疾甚風一日之間能破無
量品無明鄣惑何況瓔珞經明等覺地於百千萬劫
入重玄門報修凡夫事是故開法雲更立金剛心等
覺佛於理無失若知一品有無量品無明用法雲無
礙之智卽盡復何須開出等覺地耶妙覺者金剛後
心朗然大覺妙智窮源無明習盡名真解脫蕭然無
累寂而常照名妙覺地常住佛果具足一切佛法名
菩提果四德涅槃名爲果果問曰爲定用金剛智斷
無明爲用妙覺斷無明耶答曰涅槃云有所斷者名
有上士無所斷者名無上士問曰勝鬘經云無明住

地其力最大。佛菩提智之所能斷。答曰。若用別接通。十地等覺。卽是佛菩提智。所以者何。涅槃經云。九住菩薩。名爲聞見。十住菩薩。名爲眼見。雖見佛性。而不了了。以無礙道惑共住。故不了了。諸佛如來了了見者。卽真解脫。蕭然累外。故了了也。若別教明義。從初歡喜地。卽用佛菩提智斷初品無明。乃至等覺後心。方乃斷盡。若圓教明義。卽是初發心住。得用佛菩提智斷初品無明。乃至等覺後心。方斷盡也。第四約圓教明位。釋淨無垢稱義者。圓教詮因緣。卽中不思議佛性涅槃之理。菩薩稟此教門。理雖非淺。非深。而證

者不無淺深之位。今明圓教入道亦具四門。一有門。二空門。三空有門。四非空非有門。圓教雖有四門。而諸大乘經意多用非空非有門以明位也。正如此經。諸菩薩各說入不二法門。一往雖同。細檢不無四門之別。而多用非空非有門。入不思議解脫也。此義在下。自當可見。若隨機利物。四門赴緣。皆入不思議解脫。豈可偏用。但一往明行位義。便事須如此。是以今明圓教次位。正約非空非有門以辯也。就此卽爲五意。一簡別圓。二教明位不同。三正明圓教辯位。三引眾經論證。四料簡。五約圓教位釋淨無垢稱義。第一

簡別圓兩教明位不同者。圓教既詮圓理。菩薩稟教。圓斷五住之惑。開佛知見。住大涅槃。是則教圓理圓。智圓斷圓。行圓位圓。因圓果圓。不同別教。具如前說。今略更用五義釋別圓兩教不同之相也。一約斷無明判位高下不同。二約斷界內界外見思不同。三約斷不斷不同。四約位明法門別圓不同。五約位通不通不同。一約斷無明高下不同者。若別教明位。三十心斷界內結盡。卽伏界外無明。至迴向後心。初地方發真智。斷無明一品。乃至斷十品。名爲十地。等覺後心。斷無明方盡。妙覺常果。蕭然累外。無所斷也。此如

前說若圓教所明從初隨喜心修一心三觀入十信位斷界內惑盡卽伏界外無明十住初心卽發眞智斷無明住地初品從此四心皆斷無明至等覺後心無明方盡妙覺極地蕭然累外名究竟菩提無上涅槃也此則判位高下殊別故有圓別二教明位不同也二約斷界內界外見思無明不同者若別教三十心斷界內見思伏界外無明十地斷界外見思無明分爲三道如前別教明十地中分別若圓教十信斷界內見思圓伏界外見思無明發趣初心圓斷界外見思無明終至等覺方盡故地持論明清淨淨禪云

離一切見清淨淨禪。煩惱智障斷清淨淨禪。此竝等覺之位。明此義也。大涅槃云。十地菩薩。爲無我見論惑之所轉也。卽是斷見不盡之義。又十地菩薩。雖見佛性而不了了。諸佛如來。見於佛性而得了了。此皆約見惑盡不盡。故有了了。不了了。殊也。斷欲愛至佛果方盡者。欲愛卽是六欲。央掘經云。所謂彼眼根。於諸如來常具足無減修。了了分明見。乃至意根。亦復如是。如法華經說。六根清淨。雖未得無漏。而其六根清淨如此。當知卽是伏欲愛煩惱之位。發趣初心。發真無漏。卽分斷欲愛。至等覺方盡。故華嚴經明得佛

六根究竟清淨也。斷色愛至等覺方盡者。涅槃云。因滅是色。獲得常色。名爲色解脫涅槃。色愛方盡。斷無色至佛方盡者。因滅是受。獲得常受。想行識亦如是。是名受想行識解脫涅槃。無色愛方盡也。四住惑與無明合。四住若盡。無明亦盡。若無明盡。四住亦盡。是則圓伏圓斷圓盡。大品云。色無邊故。般若波羅蜜無邊。陰入界一切諸法。皆亦如是。又云。諸法等故。般若波羅蜜亦等。此經云。於食等者。諸法亦等。諸法等者。於食亦等。以一食施一切。若能如是。乃可取食。食法尚等。況復見思無明所緣之法。而不等耶。如此之義。

豈與前別教斷伏而不異乎。經說依了義經。勿依不了義經。三約斷不斷不同者。至論其理。虛無無明。體性本自不有。既無無明。何論智慧無解無惑。豈可分別別圓之殊。故涅槃云。誰有智慧。誰有煩惱。而言毗婆舍那。能破煩惱。此則不論斷與不斷。涅槃云。暗時無明。明時無暗。有煩惱時。則無智慧。有智慧時。則無煩惱。今約有智慧無煩惱義。故說爲斷。若約別教。多就定相論斷。卽是思議智斷明位。大乘之拙度也。若圓教明義。多說不斷。不斷而斷者。卽是不思議斷。非次位以明次位。正是大乘巧度之義。故此經云。姪怒

癡性卽是解脫。又云不斷癡愛起於明脫。問曰義推斷不斷。有三十六句。今何意分斷屬別教。不斷屬圓教耶。答曰此兩句是佛法正意。餘皆是傍。不斷而入位。義同須彌入芥子。此是不思議智斷之位也。四約法門別圓簡別者。別教明位對諸法門。非但法門不圓約位。亦有劑限。如十地論云。初地具足檀波羅蜜。於餘非爲不修。但隨力隨分。是義有餘。圓教明諸法門不如是。一法門具足一切法門。悉皆通至佛地也。五約位通不通簡別不同者。若別教明位。初地不得通二地。何況具足諸地。若圓教明位。如華嚴經說。從

初一地。具足一切諸地功德。第二正明圓教位者。亦還約七位。明五十二位不同。一十信。二十住。三十行。四十迴向。五十地。六等覺地。七妙覺地。但解者不同。有師言。圓教頓悟。一悟卽是佛。無復位次差別之殊。說十地位者。爲鈍根之人耳。如思益云。如此學者。卽不從一地至一地。又有師解云。圓教旣是頓悟。初心一悟。卽究竟圓極。而有四十二位者。但是化物方便。立淺深之名耳。故楞伽云。初地卽二地。二地卽三地。寂滅眞如。有何位次也。又有師云。圓教初頓悟。至十住。卽是十地。而說有十行。十迴向。十地者。此是重說。

意謂此諸解釋。悉是偏取。但平等法界。尚不論悟與不悟。孰論淺之與深。不悟而論悟者。不淺不深而論淺深也。尋諸大乘經。明理究竟。無過華嚴大集大品法華涅槃。雖明法界平等。無說無示。而菩薩位行。終自炳然。是以今還約七位。以明圓教菩薩之位也。一明十信位者。爲四意。一明因法生信。二明因信修行。三明因行入位。四明經說不同。一明聞法生信者。上根利智。聞圓教。詮因緣。卽中道。明無作四寶諦理。卽便信解。一寶諦。卽是如來虛空佛性。非世間。非出世間。非因非果。不可宣說。非可顯示。無說而說。說世間。

因果。卽是無作苦集。說出世間因果。卽是無作道滅。故此經大士訶彌勒云。佛知一切眾生。畢竟寂滅。卽涅槃相。不可復滅。一切眾生。卽菩提相。若知涅槃。卽生死。是爲無作之苦諦。若知菩提。卽煩惱。是爲無作之集諦。若知生死。卽涅槃。是爲無作之滅諦。若知煩惱。卽菩提。是爲無作之道諦。祇以非生死。非涅槃。非菩提。非煩惱。是一實諦。論此四諦者。卽是無作四實諦也。所以者何。約一實以明四。一實諦不作於四。四不自作。四不他作。四亦非共作。四亦非無因緣而作。四也。而說爲四者。此是無作之四。此四畢竟不可得。

卽是一實諦。名爲無作四實諦也。若聞此信解無礙者。卽信一切眾生。卽是不思議解脫。卽是大乘。卽是般若。卽是首楞嚴定。卽是佛性。卽是法身。卽是實相。卽是中道第一義諦。卽是如來藏。卽是法界。卽是畢竟空。卽是一切佛法。因此慈悲誓願。菩提心發。是爲圓教名字。卽之信解也。二明因信修行者。因此名字信心。卽已發菩提心。若欲行菩薩道。應當受持讀誦解說書寫大乘經典。末世人若欲疾得入十信位。具六根清淨。但起精進。不惜身命。應當加修四種三昧。四種三昧者。一常坐三昧。如文殊般若經說。二常行

三昧。如般舟經說。三半行半坐。如方等經法華經說。四非行非坐三昧。卽諸大乘經說種種行法。此諸三昧行法。具如諸大乘經中說。此卽代於初停止觀。今約圓教。明修初心。行諸三昧。應信解十法。十法者。如前三觀中說。一善識思議不思議因緣者。思議因緣。如上三教所明。不思議因緣者。卽是今所說。不思議無作四實諦。如前三觀中明。譬一念眠心。具一切法。不縱不橫。卽是不思議因緣。無作四實諦也。如此的取淨名大士訶彌勒云。一切眾生。卽大涅槃。卽菩提相。明此不思議因緣。餘九法亦如是。義意玄隱。今

次第明。尋者可善思之。二次明真正發心者。卽是無緣慈悲。無作四弘誓願也。無緣大慈。觀生死卽涅槃。煩惱卽菩提。與眾生此滅道之樂也。無緣大悲。觀涅槃卽生死。菩提卽煩惱。欲拔眾生此虛妄之苦也。無作四弘誓願者。知涅槃卽生死。未度苦諦。令度苦諦也。知菩提卽煩惱。未解集諦。令解集諦也。知煩惱卽菩提。未安道諦。令安道諦也。知生死卽涅槃。未得涅槃。令得涅槃也。菩薩如是慈悲誓願。無緣無念。而覆一切眾生。由如大雲。不加功用。如磁石吸鐵。是名真正菩提心也。三。明行菩提道勤修止觀者。若知生死

卽涅槃卽是善修止也。若知煩惱卽菩提卽善修觀也。如陰陽調適萬物長成。若巧修止觀卽能一心具萬行也。問曰以何爲集。答曰依此經及涅槃住無明愛一切煩惱爲集諦。集屬於苦。於今對義爲便也。四明破諸法徧者。若知生死卽涅槃卽破分段變易二種生死皆徧。若知煩惱卽菩提則破一切界內外煩惱徧也。譬如轉輪聖王能破一切強敵亦不有所破。般若波羅蜜亦復如是。能破一切法亦不有所破。五善知通塞者。知生死卽涅槃煩惱卽菩提則一切皆通。知涅槃卽生死菩提卽煩惱則一切皆塞。六善修

道品者。觀十法界五陰生死。卽是法性五陰。法性五陰。卽是性淨涅槃。卽是四念處破八倒。知涅槃卽生死。顯四枯也。知生死卽涅槃。顯四榮也。知一實諦。卽是見虛空佛性。住大涅槃也。因此四念處。修正勤如意。足根力覺道。卽道品善知識。由是成正覺。亦是鞋嚴雙樹。是則煩惱卽菩提也。七對治助道修諸波羅蜜者。知菩提卽是重惡煩惱。是以知生死卽涅槃。以起對治諸波羅蜜諸度法等侶。助知煩惱卽是菩提。開三脫門。對治若成煩惱卽菩提也。八善識位次者。涅槃卽生死。菩提卽煩惱。此是理卽。若知生死卽涅槃。

槃煩惱卽菩提。是爲名字卽。因此觀行分明。成五品弟子。卽是觀行卽。得六根清淨。名相似卽。成四十一地。卽是分證真實卽。證妙覺果。卽是究竟卽。若能善解此之次位。卽不起大乘增上慢。大乘旃陀羅之過罪也。九安忍成就者。若知生死卽涅槃。卽不爲陰界入境病患境業相境魔事境禪心境二乘境菩薩境之所壞也。若知煩惱卽菩提。卽不爲煩惱境諸見增上慢境之所壞。能忍此無作苦集。不爲所壞者。此如大智論說。能忍成道事。不動亦不退。是心名薩埵也。十順道法。愛不生者。觀生死卽涅槃。生一切諸禪定。

三昧等功德。觀煩惱卽菩提。生諸陀羅尼門。四無所
畏。十八不共法。四無礙智。一切種智。於順道法。不愛
不著。若生愛著。是名頂墮。知如虛空。不住不著。卽得
成初信心。乃至十信心也。三明因修十法入十信心
者。解正因緣。不思議無作四諦。卽修初信心。信平等
法界佛法三寶也。二真正發菩提心。慈悲誓願。憐愍
一切。卽是修念心。三勤修止觀。成一切萬行。卽是修
進心也。四用觀破諸法徧。卽是巧修慧心。五止心澁
靜。一切得失通塞之相自現。卽是修定心也。六道品
次第。增長善根。不退不沒。卽是修不退心。七迴事中

諸度助開三解脫門。卽是修迴向心。八善知次位。所
 防增上慢。離旃陀羅業。卽是修護法心。九安忍成就。
 內外惡法。皆不得生。卽是修戒心。十順道法。愛不生。
 若願求勝果。卽不愛著。所得淺近法門。故名願心。是
 以菩薩知生死卽涅槃。知煩惱卽菩提。故能巧修此
 十法。卽是修十信心。名觀行。卽因此若得三昧陀羅
 尼。得入初信心位。如此一信有十。十信有百。成鐵輪
 十信心位。住此信中。得六根清淨功德。不可思議。如
 法華經說。是名圓教柔順忍位。亦是圓教之暖頂忍
 世第一法之位也。故仁王般若云。十善菩薩發大心。

長別三界苦輪海。故知住此十信之位。斷界內見思。盡破界內界外塵沙無知。伏無明住地之惑也。四明經說不同者。如華嚴經法慧菩薩答正念天子。明菩薩觀十種梵行空。學十種智力。入初住位。卽是此教。十信位也。所以者何。觀十種梵行空。卽是一實諦。學十種智力。卽是觀無作四諦。此經卽是方等之教。明卽大涅槃。卽煩惱相。若止若觀。生相似解。卽是瓔珞經明十信。大品云。是乘從三界中出也。十法成乘。如前三觀中說。初出三界。卽十信也。又大品經云。譬如入海。先見平相。卽是仁王經明十善菩薩發大心。長

別三界苦輪海。法華明入如來室。著如來衣。坐如來座。此卽是修四安樂行。行處近處。得六根清淨。住十信位。普賢觀經明修大乘人。未得無生忍前。有十種證相。此卽是十信之位。涅槃云。復有一行。是如來行。所謂大乘大般涅槃。如大智論云。菩薩從初發心。卽觀涅槃行道。若觀涅槃行道。生相似解。卽是一行。是如來行也。二明十住者。十住名前說竟。今明初發心住略爲四意。一正釋初發心住。二明經說不同。三略辨功德。四類明九住。一正釋初發心住位者。所言發心住者。三種心發。故名發心住。三德涅槃名爲住也。

云何名三種心發。一者緣因善心發。二者了因慧心發。三者正因理心發。一緣因善心發者。眾生無量劫來。所有低頭合掌。彈指散花。發菩提心。慈悲誓願。布施持戒。忍辱精進。禪定等。一切善根。一時開發。一心具足。萬行諸波羅蜜也。二了因慧心發者。眾生無量劫來。聞大乘經。乃至一句一偈。受持讀誦。解說書寫。觀行修習。所有智慧。一時開發。成真無漏也。三正因理心發者。眾生無始以來。佛性真心。常爲無明之所隱覆。緣了兩因力。破無明暗。朗然圓顯也。此三種心開發故。故名發心。二住三德涅槃。名之爲住者。一法

身二般若三解脫。此三不縱不橫。如世伊字。名祕密藏。眞實心發。卽是法身。了因心發。卽是般若。緣因心發。卽是解脫。三心旣發。同世伊字。假名行人。以不住法。住此三心。卽是住於三德涅槃祕密之藏。故言初發心住也。若住三德之理。卽是住不思議解脫。卽是住於大乘。以不住法。住於般若。卽是住首楞嚴三昧。修持於心。猶如虛空。卽是住法性。卽是住眞相。卽是住如如。卽是住如來藏。卽是住中道第一義諦。卽是住法界。卽是住畢竟空。卽是住大慈悲。卽是住十力。卽是住四無畏。住十八不共法。四無礙智。住大悲三

念處住大神通住四攝法住諸波羅蜜一切三昧一切陀羅尼門舉要言之卽是住真應二身一切佛法也。二明諸大乘經初發心住名義不同者華嚴經云初發心時便成正覺了達諸法真實之性所有聞法不由他悟是菩薩成就十種智力究竟離虛妄無染如虛空清淨妙法身湛然應一切當知此卽是發真無漏斷無明初品也卽是此經明一念知一切法是道場成就一切智故又卽是此經入不二法門得無生法忍也卽是大品經明從初發心卽坐道場轉法輪度眾生當知此菩薩爲如佛又大品經明菩薩從

初一日行般若智慧。由如日光。假使舍利弗目犍連。滿閻浮提。四天下。如稻麻竹葦。智慧欲比菩薩。如滿閻浮提。四天下。螢光。欲比日月光也。又卽是大品經阿字門。所謂一切法初不生也。卽是法華經云。爲令眾生開佛知見。又法華云。龍女於刹那頃發菩提心。成等正覺。卽往南方無垢世界。坐道場。轉法輪也。卽是大涅槃云。發心畢竟二不別。如是二心前心難。卽是涅槃經。復有一行。是如來行。所謂大乘大般涅槃。初住分證涅槃也。如此等諸大乘經。悉是圓教。明初發心住也。三。明初發心功德。發心功德。無量無邊。非

是凡夫二乘所測不可宣說。今採大乘經意略以十種法門稱述初住圓滿功德。一者住圓滿清淨菩提之心。卽是無生法忍。無緣慈悲。無作誓願。普覆法界。二於一念中成就一切萬行。諸波羅蜜。三得一切種智。圓斷法界見思無明。四明佛眼。圓見十法界。三諦之法。五圓入一切法門。所謂得二十五三昧。入王三昧。一切三昧悉入其中。冥益眾生。八番破二十五有。六成就菩薩圓滿業。能顯一切神通。所謂三輪不思議化。彌滿法界。顯益眾生。八番利益。二十五有。七能成就眾生。開權顯實。入一乘道。八能嚴淨一切佛土。

如佛國品所明。九能起法界三業。供養一切十方諸佛。得圓滿陀羅尼。受持一切佛法。如雲持雨。十能從一地具足一切諸地功德。心心寂滅。自然流入薩婆若海。故華嚴明初住菩薩所有功德。三世諸佛。歎不能盡。佛若具足說。一切凡夫人間。迷亂心發狂。此乃不思議難解之事。諸大乘了義經之所稱說。豈同通教所明十住功德比格。此明初住。與別教初地。智斷功德。神通變化。一往是齊。與經論所說。或深或淺。意有所在。四類釋九住者。如此初住。三觀現前。無功用心。念斷法界無量品。無明不可稱計。一往大分略。

爲十品智斷。卽是十住。故仁王經云。入理般若名爲住。卽是十番進發。無漏真明。同入中道佛性第一義諦之理。以不住法。從淺至深。住佛三德涅槃之理。卽是十品住。一切佛法。故名十住也。三明十行者。卽於佛性第一義諦。無漏真明。一心具一切行。念念進趣。流入平等法界海。破十品無明。成十品智斷。一切諸行。諸波羅蜜。不可思議。增長出生。自行化他。功德與虛空法界等。故名十行也。四明十迴向者。無功用不思議。無漏真明。念念開發。增長一切法界願行。事理和融。心心寂滅。自然迴入平等法界。薩婆若海。又進

破十品無明。證十品智斷。故名十迴向也。五明十地者。無漏真明。入無功用道。猶如大地。能生一切佛法。能荷負法界眾生。普入三世佛地。廣大如法界。究竟如虛空。又進破十品無明。成就十品智斷。約此以明十地也。六明等覺地。觀達無始無明源本。邊際智滿。畢竟清淨。斷最後窮源微細無明。登中道山頂。與無明父母別。是名有所斷者。名有上士也。七明妙覺地者。究竟解脫。無上佛智。故言無所斷者。名無上士也。此卽是三德。不縱不橫。究竟後心。大涅槃也。是大涅槃。名諸佛法界。豎深橫闊。能用二十五三昧。普化眾

生隱顯十番利物究竟周普。譬如大樹其根若深入枝條亦大。若實相智慧窮源盡性化用之功則彌滿法界無方大用究竟圓極也。故智論云智度大海佛從來智度深海佛窮底也。大品經云過茶無字可說涅槃云不生不生不可說也。若作如此而辨位者皆是寂滅真如平等法界不思議無次位之次位也。第三引眾經證成圓教位者。大涅槃明月愛三昧從初一日至十五日光明漸漸增長。又從十六日至三十日光明漸漸盡。月光漸漸增長。譬智德十五摩訶般若光明漸漸減盡。譬十五斷德無累解脫無明漸減。

盡也。十五種智斷者。三十心爲三智斷。十地爲十智斷。等覺爲一智斷。妙覺爲一智斷。合爲十五智斷。故從初一日。至十五日。故以月爲譬也。月體卽譬法身。法身是一。光明漸增。譬般若智德。不生而生。光明漸減。譬解脫斷德。不滅而滅。故涅槃經明。從初安置諸子秘密之藏。三德涅槃。然後我亦當於此秘藏。而般涅槃。此最後究竟涅槃。名爲不生不生。般若畢竟不生不生。不滅不滅。更無惑可滅也。問曰。若是圓位。頓悟。一證卽便究竟。何得引月愛三昧。十五日月諭。答曰。一向無淺深。已如前破。但證位是諸佛境界。凡夫

未證豈可定執。今借十五日月諭者。此約不可諭中而論諭也。故經云。又解脫者。名無譬諭。無譬諭者。卽真解脫。譬如面如滿月。實非無有五根相同彼月也。問曰。何得知月諭譬地位。答。勝天王般若具出此義也。問曰。若約佛性中道爲無明所覆。何得定有四十二品。答曰。此義前已略明。無明雖無所有。不有而有。不無淺深階品。一往大分爲四十二品。然論品數。實自無量無邊。不可說爾。故智論云。無明品類其數甚多。是故處處說破無明三昧。又云。法愛難盡。處處云重說般若也。法華云。諸佛爲一大事因緣故。出現於

世爲令眾生開佛知見。示佛知見。悟佛知見。入佛知見。道故。此之四義。南嶽師解云。開佛知見。卽是十住。示佛知見。卽是十行。悟佛知見。卽是十迴向。入佛知見。卽是十地及等覺地。皆言佛知者。悉得一切種智也。皆言佛見者。悉得佛眼。又結句云。是爲諸佛一大事。因緣者。同入一乘。諸佛寶相也。又云。唯佛與佛。乃能究盡諸法實相。又火宅品。諸子門外索車。長者各賜諸子等一大車。是時諸子。乘此寶乘。遊於四方。嬉戲快樂。自在無礙。直至道場。言四方者。卽譬開示悟入四位也。直至道場。卽是究盡諸法實相。妙覺極位。

如此皆是明圓位之異名也。大品經明字等語等四十二字門。南嶽師解云。此是諸佛密語。表四十二心之位。若學問人多疑此語。謂大智論無此釋。然龍樹釋大品經論有千卷。什師竝略。何必無此釋也。今謂此釋實應冥會。所以然者。經說初阿後茶。中有四十二字。初阿字門。具四十二字。後茶字門。亦具四十二字。華嚴經云。從初一地。具足一切諸地功德。詳此義意。極以相關。又大品經云。若聞初阿字門。則解一切義。所謂一切法初不生故。此豈非圓教菩薩初得無生法忍之位耶。過茶無字可說。此豈非妙覺極地無。

上無過不可過此字有法而可說耶。又大品廣乘品說一切法門竟。卽說四十二字。豈非是圓教菩薩從初發心得諸法實相。具一切佛法。故名阿字。至妙覺地。窮一切諸法源底。故名茶字。作此解釋。圓教之位。極似分明。又四十二字門後。卽說十地。此卽是顯別教方便之次位也。又次十地。說三乘共十地。卽是顯通教方便之位也。經文三處。然決比圓別通三教。顯在大品經文也。故大品云。是乘從三界中出。到薩婆若中。又三慧品云。菩薩從初發心。修習三慧。至坐道場。仁王般若云。三賢十聖忍中行。唯佛一人能盡源。

前所引思益楞伽等經。明寂滅真如。有何次位。卽是無次位之次位也。又瓔珞經云。三賢菩薩。心心寂滅。自然流入薩婆若海。華嚴經明四十一位。旣是圓頓之教。明圓位之意。甚自分明。但有時開別教方便之說。事相隔別。似如淺近。故十地論師。作教道證道二道明義。或作地相地實二種明義。正是爲修別教方便事相之文也。又云。一切無礙人。一道出生死也。智論云。菩薩從初發心。觀涅槃行道。乃至坐道場。又云。菩薩從初發心。觀諸法實相慧。名爲般若波羅蜜。至佛心中。變名一切種智。譬如大海。有始入者。有入至

半者。有到彼岸者。皆名入海。菩薩亦爾。從初發心。觀諸法實相。實相雖一。而觀智不無淺深之殊也。第四料簡。問。何不依大乘經論。對諸法門明位。答曰。今引此等經論。釋成圓教。次位者。此約不思議平等法界。辨不思議非次位之次位也。若別對法門。尋者若不得意。多別解別執。則失圓通中道之正意。不思議諸佛菩薩之次位也。是事非凡夫所知。止可仰信而已。故華嚴經云。諸地不可說。何況以示人。所以然者。且置大乘懺悔。發初隨喜。一信心。獲一旋陀羅尼門。已不可向一切人說。設復種種分別。亦不可解。何況圓

教四十二字法門。二乘尙不聞其名。豈有凡夫而能說耶。且置是事。如聲聞法中。學四念處。發暖法時。亦不可向一切外凡未證者說。設種種因緣而解說者。終不能解。豈況圓教諸佛菩薩行位。而可知可說耶。且置是事。如世凡人坐禪。發五支功德。尙不可爲未證者說。設方便巧說。未證之者。亦不能解。豈況諸佛菩薩地位法門。而可分別耶。末代法師。多取經論方便。所明斷伏對諸法門。釋大乘賢聖地位。執諍云云。今意不爾。所以者何。如水性至冷。飲者方知。心無實行。何用問爲。是以今辨四教四位者。出諸經論。此乃

諸佛權實法門。於四不可說中。用四悉檀而說。此是諸佛大菩薩境界。非諸小菩薩聲聞緣覺所知。豈況末代凡夫所能解也。深屬一家學道說法之者。自非得證分明。慎勿偏執經論。諸佛菩薩方便赴緣之言。空諍不思議不可測量之行位也。普願法界眾生。歸僧息諍論。入大和合海也。第五約五味譬顯四教位者。大涅槃經明五味譬不同。以成四教辨位不同之相也。經云。凡夫如乳。須陀洹如酪。斯陀含如生酥。阿那含如熟酥。阿羅漢辟支佛如醍醐。此譬意恐是顯三藏教所明位也。經又云。凡夫如乳。聲聞如酪。辟支

佛如生酥。菩薩如熟酥。佛如醍醐。此譬意恐是顯通
教明位也。經又云。凡夫如雜血乳。羅漢如清淨乳。支
佛如酪。菩薩如生熟酥。佛如醍醐。此譬意恐顯別教
明位也。經又云。雪山有草名曰忍辱。牛若食者。卽得
醍醐。忍辱草者。論八聖道。乳論十二部經。隨有能修
入聖道者。卽見佛性。住大涅槃。此卽譬於圓教菩薩。
從初發心。卽開佛知見。見於佛性。住大涅槃也。涅槃
明此之四譬。譬四教明位。其義宛然。若不信四教明
位不同者。云何銷釋經此五味四種譬也。今用前四
教明位。合此四譬。一往似如目覩。祇自聖人密意難

知何可定執。又涅槃云。譬如有人。置毒乳中。乃至醍醐。亦能殺人。此譬應得兩用。若對經教。五味明義。處處皆得見佛性入涅槃也。此卽是不定教門。事在下釋。若是約位明殺人義。四位五味。根緣不定。隨其大乘機發。卽皆以如來滅度而滅度之。故同殺人之義也。第六辯眾經明四教位多少不同者。華嚴頓教。但明別圓兩位。漸教之初。聲聞經。但明三藏教三乘之位。若方等大集。具用四教明位。摩訶般若。但明通別圓三教之位。若法華經。但明圓教一佛乘。開示悟入之位。大涅槃經。亦具明四教之位。俱通大乘。明二乘

如前。但通教菩薩位。用別接通。名佛性四德涅槃。三藏二乘如前廢。三藏大乘之位。無復三阿僧祇劫伏結之因。三十四心斷結之果。二涅槃也。又通教三藏教明二乘位。至大涅槃。俱引入別圓二位也。問曰。若廢三藏佛位。何得言羅漢辟支佛。佛如醍醐耶。答。三位俱界內結盡。此結成往昔之義。非今之所用也。

四教義卷第六

終